



Sarajevo, 17.06.2025.godine

**KOLEGIJU PREDSTAVNIČKOG DOMA
PARLAMENTARNE SKUPŠTINE BiH**

BOSNA I HERCEGOVINA PARLAMENTARNA SKUPŠTINA SARAJEVO			
PRIMLJENO: 17-06-2025			
Organizacija	Klasifikacija	Redni broj	Broj priloga
01-	10-1-	1399	1r

n/r članova Kolegija

Na osnovu člana 8. Poslovnika Predstavničkog doma Parlamentarne skupštine BiH („Službeni glasnik BiH“ br. 79/14, 81/15 i 97/15, 78/19, 26/20, 53/22, 59/23, 87/23, 50/24 i 73/24), podnosim poslaničku

INICIJATIVU

kojom se zadužuje Vijeće ministara Bosne i Hercegovine da u saradnji sa Ministarstvom sigurnosti BiH, međunarodnim i lokalnim partnerima hitno pronade novu lokaciju za smještaj migranata koji trenutno borave u migrantskom kampu Blažuj, koja će ispunjavati sigurnosne, tehničke i humanitarne standarde, a u interesu sigurnosti građana i očuvanja javnog reda i mira na području Ilidže.

Obrazloženje:

U posljednje vrijeme svjedočimo eskalaciji nasilja i najtežih krivičnih djela počinjenih od strane korisnika migrantskog kampa u Blažuju. Obračuni uz korištenje oružja, rasturanje droge, ubistva, krađe, kao i uznemiravanje lokalnog stanovništva postaje svakodnevica.

Općina Ilidža je općina sa najvećim fiskalnim prometom u Federaciji BiH i općina sa najvećim brojem turista, kao i registrovanih noćenja. Na pragu nove turističke sezone u kojoj se očekuje između 250.000 – 300.000 turista, dešava se eskalacija krivičnih djela od strane korisnika kampa Blažuj. Planirana masovna javna okupljanja i manifestacije, s obzirom na trenutnu situaciju, predstavljat će veliki izazov u organizacionom smislu.

Prisustvo migrantskog centra u neposrednoj blizini urbanog i turističkog područja, već pomenuta eskalacija nasilja i različitih krivičnih djela, uz osjećaj straha kod lokalnog stanovništva i uznemirenosti kod turista, ozbiljno narušava normalno odvijanje života na ovom području, kao i imidž i privredni razvoj općine Ilidža.

Od formiranja migrantskog kampa, u posljednjih 7 godina, evidentirano je preko 120.000 registrovanih korisnika, te su zabilježeni brojni incidenti, kako u samom kampu, tako i u blizini kampa, na području općine Ilidža, ali i Kantona Sarajevo. Kada bi u policijskim izvještajima bili izostavljeni slučajevi koje su počinili korisnici migrantskog kampa, Ilidža bi bila jedna od najsigurnijih općina Kantona Sarajevo. Ovako je sasvim suprotna situacija.

Migrantski kamp u Blažuju, nikada nije zadovoljavao osnovne uslove za svoju namjenu. Smješten je u bivšoj kasarni, bez adekvatne komunalne infrastrukture, gdje je evidentno da se ne radi adekvatnim uslovima za human i kontrolisan boravak što doprinosi nestabilnosti i narušavanju ljudskih prava korisnika, kako migranata, tako i lokalnog stanovništva.

Ova inicijativa se ne temelji na negiranju prava migranata na pomoć i zaštitu. Naprotiv, ova inicijativa istovremeno predstavlja potrebu da se zaštiti lokalno stanovništvo, održi javni red i mir, smanji broj krivičnih djela, ali i pronade rješenje za novu lokaciju kampa koja će ispunjavati relevantne standarde sigurnosti, nadzora i humanog tretmana migranata. Na taj način će biti zadovoljene i potrebe migranata i lokalne zajednice.

U interesu očuvanja sigurnosti građana, stabilnosti zajednice i daljnjeg razvoja Ilidže kao otvorene, ekonomski progresivne i turistički atraktivne sredine, tražim hitnu realizaciju ove inicijative.

Poslanik SDP BiH
Saša Magazinović

